

Preparacionnan pa dia 8 di Juli ta bayendo full speed

Museo Arqueologico lo inaugura exposicion 'Moving Landscapes' durante Move Bo Body!

ORANJESTAD - Diaranzon anochi Museo Arqueologico Nacional Aruba a invita su 'stakeholders', voluntarionan y otro persona y instancianan cu ta sostene Museo den un of otro manera pa haya un 'preview' di e exposicion 'Paisahenan den Muecion' cu Museo ta preparando pa presenta oficialmente pa publico diabierna awor, durante e evento 'Move Bo Body!'

Diabierna, dia 8 di juli pa mas o menos 8 di anochi, Museo, na un manera 'high-tech', lo inaugura oficialmente na tur publi-

co presente e parti den su exposicion cu a cambia completamente. E parti aki ta dedica na Expressionnan Contemporaneo inspira pa pasado Amerindio di Aruba y pa e prome 2 aña cu a habri exposicion di Museo tabata luci e bunita obra di arte di artista Ciro Abath. E obra aki a ser inspira pa pasado Amerindio, como alavez pa e Koninkrijkspele di aña 2009, cual pa prome biha tabata encera Cultura y Arte banda di Deporte. Actualmente, por admira e obra impresionante di sr. Abath den su espacio



nobo den hardin di Museo Arqueologico, unda e ta luci surreal y briyante den rayanan di solo.

E exposicion di Expressionnan Contemporaneo nobo a cambia completamente e esfera den e parti aki di e sala di exposicion permanente di Museo Arqueologico y a dune un toke mystico. 'Curador invita' Elvis Lopez di Ateliers '89 a splica e idea tras di e exposicion y pakiko a escohe e cuadranan di e artistanan Joannes Donati, Angiolina Henriquez y Wouter van Romondt. E tres hoben artistanan Priscilla Lacle, Weng Mee Tang y David Winklaar a conta con cada un di nan a ser inspira pa un di e obranan di e pintornan y alavez a laga e paisahe di Aruba di awendia inspira

nan pa traha e obranan cu awor ta duna un bida noba e ultimo parti di e sala di exposicion di Museo.

Minister Visser di Departamento di Salubridad a sorpresa Museo Arqueologico cu un speech spontaneo y a mustra su sosten pa e proyecto 'Let's Move! Museums & Gardens', di cual e exposicion 'Moving Landscapes' ta un parti inspirativo pa nos comunidad pero pa hobennan en especial y lo por duna e empuhe pa mas hobennan cuminsa expresa nan mes na un manera creativo y sano. Tambe a menciona e 'Mural' riba e muraya di Kong Hing Supermarket na unda pa mas di un siman caba hobennan motiva ta trahando bou guia di artista Timothy Charles pa finaliza

un obra di arte gigantesco cu mensahenan positivo dirigi pa otro hobennan y nos comunidad en general.

E 'Mural' como tambe e exposicion 'Moving Landscapes' lo ser finaliza y presenta durante e evento pa muchanan y hobennan 'Move Bo Body!' cual lo tuma lugar diabierna awor, dia 8 di Juli cu workshops den Museo, presentacionnan dilanti di Museo y riba parkinglot di Kong Hing na Schelpstraat, Oranjestad. E evento aki ta cuminsa pa 4'or di atardi cu actividanan hopi varia y recreativo y lo clausura e anochi cu un 'open-air-dance-floor' riba plein di Monumentenfonds cu DJ 101. Bini un, bini tur, 'join in the fun' y Move Bo Body! Diabierna awor! □

